



Il temp maximal da discurren en il cussegl grond vegn reduci da diesch sin sis minuts e tar la regenza sin diesch minutas.

50

# «La autodisciplina è la clav»

## Augment d'effizienz en il cussegl grond

■ **(anr/fa) La cumparegliazion cun auters chantuns ha mussà ch'il cussegl grond grischun lavura da maniera detg effizienta. Tuttina ha il parlament decis intginas mesiras per render quella lavur anc pli effizienta.** Durant la sessiun d'avust 2011 ha inoltrà Vera Stiffler (pld, Cuira) ina dumonda per in conclus direct per augmentar l'effizienz da la lavur parlamentara. *Ludwig Waidacher* (pld, Scanvetg), il president da la cumissiun predeliberanta, ha preschentà las propostas principalas co cuntanscher quella finamira: «Las sesidas la saira duessan vegnir abolidas, il salid a tots avant mintga votum pudessan ins laschar davent, il temp da discurren duess vegnir scursani e las dumondas per l'ura da dumondas duessan vegnir inoltradas ordavant en scrit.» *Vera Stiffler* ha ditg ch'ins haja empruvà da chattar soluziuns pragmaticas che chattian ina maiortad en il parlament.

### Proposta da betg entrar en materia

*Urs Hardegger* (pld, Seewis) ha manegia

che mintgina e mintgin en sala dal cussegl grond possa sez gidar a render la lavur parlamentara pli effizienta, «igl è baud penibel da vulair reglar quai cun lescas.» Perquai ha'l proponi da betg entrar en materia. Da quel avis era er *Jakob Barandun* (pld, Bravuogn) e *Martino Righetti* (pcd, Roveredo). *Hans Geisseler* (pcd, Tschintg Vitgs) ha ditg ch'el haja già sco anteriur president dal cussegl grond l'ocasiun da cumparegljar la lavur dal parlament grischun cun quella dad auters chantuns e vis ch'il cussegl grond a Cuira nun haja d'avair tema da la cumparegliazion. Tuttina ha'l proponi d'entrar «per respect da la lavur prestada da la cumissiun predeliberanta» en materia e tractar la proposta. Cun 73:38 vuschs e 4 abstenziuns da la vusch era la maiortad dal cussegl grond da ses avis.

### Presidi dal cussegl duai intervegnir

Cun 72:29 vuschs e 4 abstenziuns ha decis il parlament da mantegnair la pusaiavadad da far era sesidas la saira. Cun 51:45 vuschs ed 8 abstenziuns era la

maiortad sco la cumissiun da l'avis da simplifitgar il salid, na pli tar mintga votum, mabain mo pli ina giada al di. Tar l'artitgel 56 abs.1 che regla il temp maximal da discurren aveva proponi la cumissiun da scursanir il temp da discurren per ils deputads da diesch sin sis minuts e da limitar per la regenza il temp da discurren sin diesch minuts. Quella proposta ha il cussegl grond refusà cun 70:36 vuschs e 3 abstenziuns. L'artitgel 71 abs.2 regla l'ura da dumondas: Il pli tard in'emna ordavant inolteschan ils deputads lur dumondas al secretariat dal parlament. A chaschun da l'ura da dumondas las prelegian els alura. Nov duain vegnir scumpartidas las dumondas en scrit a tut ils commembers dal cussegl grond ordavant. Ils cussegliers guvernativs respundan alura a bucca las dumondas. Questa nov'organisaziun da l'ura da dumondas è vegnida acceptada dal cussegl grond senza cuntravusch. Cun 79:14 vuschs e 12 abstenziuns ha acceptà il parlament grischun la revisiun parziala da l'urden da gestiun dal cussegl grond.